

# *ANDRIAMANITRA NO MPANDIKA*

## *TENINY MANOKANA*

 Rainay An-danitra, ny Teny anankiray avy Aminao dia hanana dikany betsaka foana noho izay azon'ny olona hatao na lazaina, satria ny olona dia miandry ny hahita Anao. Ary misaotra Anao izahay fa misy ireo izay eo ambanin'ny fiandrasana, mitady zavatra mba hitranga izy ireo. Ary rehefa mangetaheta zavatra ny olona, ilay lalina miantso ny Lalina, dia tsy maintsy hisy Lalina iray mba hamaly an'io antso io. Ary izany no maha-eto anay izao hariva izao, satria eo amin'ny fon'ireto mpitoriteny ireto, sy ny olona, ny hiantso anay miaraka mba hangataka Aminao ny fankasitrahaha sy fitahiana, eo am-pinoana fa Ianao no hanasitrana ny marary sy hamonjy ny very, ary hanao ny Teninao ho voaseho.

<sup>2</sup> Ary mivavaka izahay, Ray An-danitra, mba ho Ekenao ho anay izao raha miandry Anao am-paneatre-tena izahay, isankariva. Enga anie tena hisy ny—ny firotsahan'ny Fanahy Masina, ary enga anie ny olona tsirairay ho jamba amin'ny zavatra hafa rehetra manodidina azy ireo ankoatran'Andriamanitra. Enga anie hisy fitarainana lehibe hivoaka avy ao anivon'ny olona, mangetaheta an'Andriamanitra, mandra-pahatongan'ny fifohazana anankiray eran'ny firenena eto ka ny fiangonana rehetra hahazo olona betsaka, ireo mpanota hitaraina amin'Andriamanitra mba hahazo famindrampo, ary—ary ny Fanahy Masina hanasitrana ny marary, hanao ny mandringa handeha, sy hanangana ny maty, ary hanaiky an'ireo zavatra izay nampanantenaina ao amin'ny Teninao.

<sup>3</sup> Avia, Tompo Jesosy, ka tanteraho ny Teny fikasanao. Tongava eto aminay izao hariva izao. Mino izahay fa Ianao no tsy miova omaly, anio, ary mandrakizay, fa ireo Teny fikasanao dia tsy mety levona. Ny lanitra sy ny tany ho levona fa ny Teninao tsy ho levona. Enga anie hisokatra ny fahalalanay. Enga anie ho tonga ny Fanahy Masina ka hametraka an'ilay tany voaasa. Enga anie ny fahalalanay hisokatra ho an'ny Fanahy sy ny herin'Andriamanitra izao hariva izao, mba Hahafahany maneho ny Teny Nampanantenainy amin'ny alàlanay. Fa mangataka izany amin'ny Anaran'i Jesosy izahay. Amena.

<sup>4</sup> Ankehitriny, izao hariva izao, ianareo izay mandinika ny lahateny, ndao isika hamadika ny Baiboly ao amin'ny Bokin'ny Petera Faharoa, ary hanomboka amin'ny andininy faha-15, ho an'ny fomba anankiray famakiana ny Soratra fotsiny mandritry ny fotoana fohy.

*Ary dia hataoko izay zakako mba hisy hahatsiarovanareo izany zavatra izany mandrakariva rehefa maty aho.*

*Fa tsy nanaraka ny fahafetsen'ny saina izahay, anganongano, raha nampahafantatra anareo ny hery sy ny fihavian'i Jesosy Kristy Tompontsika, fa efa nanatri-maso ny fiandrianany izahay.*

- 5 Tiako izany, “nanatri-maso.” Tsy karazana angano. Vavolombelona ny amin’izay resahanay izahay.

*Fa nahazo laza sy voninahitra tamin'Andriamanitra Ray izy, ary tonga teo aminy ilay feo avy tamin'ny voninahitra lehibe indrindra hoe, Ity no Zanako malalako, izay tena Sitrako.*

*Ary renay io feo avy tany an-danitra io, raha niaraka taminy tany an-tendrombohitra masina izahay.*

*Manana ny teny faminaniana mafy orina kokoa isika; koa ianareo anie hanao tsara raha mandinika izany ianareo, fa toy ny jiro izay mahazava ao amin’ny... toerana maizina, mandra-pahazavan’ny andro, ka miposaka ao am-ponareo ny fitarik’andro:*

*Mahafantatra an’izany voalohany, tsy misy faminaniana ao amin’ny soratra izay avy amin’ny fandikan’olona.*

*Fa ny faminaniana dia tsy avy tamin'ny sitrapon'ny olona tany amin’ny andro taloha: fa avy tamin'Andriamanitra no nitenenan’ny olona masina arak’izay nitondran’ny Fanahy Masina azy ireo.*

- 6 Enga anie ny Tompo hanampy ny Fitahiany amin’ny famakiana ny Teniny. Ankehitriny, dia haka an’izao aho ho lohahevitra anankiray: *Andriamanitra No Mpandika Teniny Manokana.*

- 7 Miaina ao anatin’ny andron’ny fifanjevoana isika. Miaina ao anatin’ny andro anankiray isika izay saiky tsy hahafantarany lehilahy sy vehivavy izay hatao intsony. Ny zavatra rehetra, izany—izany dia toa ao anatin’ny korontana. Ny zavatra rehetra, izany dia toa misy fomba fijery samihafa marobe. Izany dia Satana, no manao an’izany.

- 8 Ankehitriny, Andriamanitra dia tsy afaka mitsara olona arapahamarinana, ara-pahitsiana, raha tsy misy fenitra izay tsy maintsy Hitsarany azy ireo. Ary ny Baiboly no milaza fa Izy dia hitsara ny olona rehetra amin’ny alàlan’i Jesosy Kristy, ary Jesosy Kristy no Teny. Ao amin’ny Masindahy Jaona, ny toko 1, hoy Izy:

*Tamin’ny voalohany ny Teny, ary ny Teny tao amin'Andriamanitra, ary ny Teny dia Andriamanitra.*

*Ary ny Teny dia tonga nofo, ka nonina tamintsika, . . .*

<sup>9</sup> Ankehitriny, isika rehetra androany dia fampisehoana an'ireo Toetrary. Ao amin'Andriamanitra . . . Voalohany dia tsy mbola Andriamanitra akory aza Izy, Andriamanitra, isika niantso Azy fotsiny "ilay Tokana Mandrakizay." Tsy mbola Andriamanitra Izy, satria ny teny (teny Anglisy) *God* dia midika hoe "zavatra ho tomponia" ary tsy mbola nisy na inona na inona nanompo Azy. Noho izany dia ilay Tokana Mandrakizay Izy, ilay—ilay fototry ny Loharanon'ny fahalalana rehetra. Ary tao amin'io Loharanon'ny fahalalana rehetra io dia tsy mbola nisy atoma, molekiola, na inona, hazavana na taiza na taiza, kintana, volana, zavatra hafa. Andriamanitra, ny fahafantarantsika an'Andriamanitra, dia ilay Fanahy lehibe izay Mandrakizay (tsy niandoha mihitsy, tsy nifarana mihitsy), tany Izy. Ary ny tao Aminy dia toetra: toetra mba ho Andriamanitra izany, avy eo ny Toetrary ho Ray, toetra ho Zanaka, toetra ho Mpamony, toetra ho Mpanasitrana. Ireo toetra rehetra ireo dia tao Aminy. Ary ankehitriny Izy . . . Ireo zavatra izay naseho hatramin'izay ireo dia Toetrary fotsiny izay natao voasaho.

<sup>10</sup> Ny tiako ho lazaina, *toetra* dia Ny "fisainany." Ary ny—ny *teny* dia "fisainana naseho." Ary dia tao amin'ny Fieritreretany izany. Ary rehefa nilaza Izy hoe, "Aoka hisy," dia nisy izany. "Aoka hisy," dia nisy izany.

<sup>11</sup> Ary ankehitriny, tsarovy, ianareo Kristiana dia Fisainany talohan'ny nisian'ny tany anankiray. Ary ianareo no fanehoana ny Fieritreretany. Talohan'ny nisian'ny tany anankiray akory aza, dia tao amin'i Kristy ianareo, (amena) tao amin'Andriamanitra tamin'ny voalohany. Izany no manao anareo, arak'izany, hitanareo, ho Vahoakany. Ary ny zavatra rehetra dia Andriamanitra, Izy Tenany, manao ny Tenany ho azo kasihana hany ka azo nokasihan-tàhana Izy, nojerena, sy—sy ny sisila. Ary izany Andriamanitra, ny zavatra rehetra.

<sup>12</sup> Dia hoy ny olona hoe, "Ny fandikana . . ." Niresaka aho teto vao tsy ela akory tao amin'ny fivoriana, lehilahy anankiray no nilaza tamiko, hoy izy hoe, "Rahalahy Branham, manana fandikana diso ianao. Tsy marina ny nandikanao an'Ity."

<sup>13</sup> Ankehitriny, mandre isika . . . Mandeha mankany amin'ny Metodista izy ireo, dia hoy izy ireo hoe "Tsy marina ny nandikan'ny Batista." Hoy ny Batista hoe, "Ny Pentekotista tsy marina." Ny Pentekotista milaza fa "Ny-ny an'ny Tokana tsy marina." Ny an'ny Tokana manao hoe, "Ny Assemblée tsy marina." Ary ny tsirairay dia milaza amin'ny anankiray ho tsy marina.

<sup>14</sup> Andriamanitra no Mpandika Teniny Manokana! Izy tsy mila olona handika ho Azy. Izy no manao ny Fandikany Manokana. Iza no olona afaka mandika an'Andriamanitra? Andriamanitra no Mpandika Teniny Manokana.

<sup>15</sup> Ankehitriny, miteny eto Petera, mahita isika fa tamin'ny voalohany Andriamanitra nanao hoe, "Aoka hisy mazava," dia nisy mazava, izany no fandikana an'ilay izy. Rehefa nilaza zavatra anankiray Andriamanitra ka niseho izany, dia izany no fandikan'Andriamanitra fa marina ny Teniny. Hitanareo? Rehefa hoy Izy hoe, "Aoka hisy mazava," dia izany no Fieritreretany voalohany talohan'ny nisian'ny zavatra mazava anankiray. Rehefa hoy Izy hoe, "Aoka hisy mazava," dia nitsiry teny amin'ny habakabaka ny mazava, izany ilay fandikana. Tsy misy olona tokony handika an'izany, fa Andriamanitra no niteny ka dia nisy izany. Rehefa miteny Andriamanitra ka voaseho izany, dia izany no fandikana ny Teniny. Nahoana no tsy ahitan'ny olona an'izany? Nahoana ny olona no tsy mahita an'izany?

<sup>16</sup> Rehefa manao teny fikasana anankiray Andriamanitra ka hoy Andriamanitra... Tamin'ny—tamin'ny voalohany, ao amin'ny Genesisy, nitsinjara ny Teniny tamin'ny taona tsirairay Izy tahaka ny nidinan'Izany avy tany amin'ny fiandohana hatramin'ny fiafarana. Ary, nidina avy tamin'ireo taona ireo, ny fiangonan'izao tontolo izao dia nanao an'ireo zavatra rehetra ireo hifangaro tamin'ireo fombafomba, sy ny sisa, ary Andriamanitra dia nandefa teo amin'ny sehatra foana, avy ao amin'ny Testamenta Taloha sy Vaovao, mpaminany! Ary ny Tenin'ny Tompo dia tonga amin'ny mpaminany. Ary ahoana no anaovan'Io an'ilay izy? Maneho ny Tenin'Andriamanitra Io. Ny fanehoan'Andriamanitra, izay miteny na marina izany na diso. Tsy misy olona tokony handika an'Io, ny Teny no mandika ny Tenany. Andriamanitra no nampanantena an'izany ary dia miseho izany!

<sup>17</sup> Inona moa ny soa hataon'ny filazana zavatra hafa mikasika an'Izany? Iza no lehilahy mpanota anankiray izay hanandrana hilaza (rehefa nanao teny fikasana anankiray Andriamanitra ka ataon'Andriamanitra izany) fa izany fandikana izany dia diso? Izany dia Andriamanitra Izy Tenany no manao ny Fandikany Manokana, mandika. Izy tsy mila olona handika Azy, Izy no mandika ny Tenany amin'ny alàlan'ny fanehoana an'izay Nampanantenainy fa Hataony.

<sup>18</sup> Oh, raha mba afaka mahita an'izany fotsiny mantsy ny fiangonana ka mahita ny teny fikasana izay notsinjaraina ho an'ny taona tsirairay! Ireo taona hafa rehetra, dia Andriamanitra no nandefa teo amin'ny sehatra (nidina avy tao amin'ny taona fiton'ny fiangonana mihitsy aza) ary naneho ny zavatra rehetra izay Nampanantenainy hatao. Ny zavatra rehetra, tsy nisy zavatra anankiray tavela tsy vita. Izany tokoa! Izay Nolazainy fa Hataony, dia Nataony izany.

<sup>19</sup> Satria rehefa nilaza Andriamanitra, tany aloha tany ao amin'ny Isaia, hoy Izy hoe, "Hitoe-jaza ny virijiny," dia nitoe-jaza izy. Ankehitriny, iza—iza no afaka handika an'izany? Andriamanitra no nanao ny fandikana. Hoy Izy hoe, "Hitoe-

jaza ny virijiny,” dia nitoe-jaza izy. Ankehitriny, inona moa ianareo...ianareo tsy afaka...Tsy misy na inona na inona azo lazaina mikasika an’izany, satria Andriamanitra no nilaza fa hitoe-jaza izy ary dia nitoe-jaza izy. Saingy jamba loatra ilay fiangonana tamin’izany mba hahita an’ilay izy. Hitanareo, nanana an’ireo heviny manokana ny amin’izany izy ireo. Izany dia tena—tena samihafa loatra tamin’izay nandrasan’izy ireo.

<sup>20</sup> Petera eto dia nanondro indray, hoy izy hoe, “Andriamanitra no naneho an’i Kristy tamin’ny alàlan’ny Teniny, hoy Izy hoe, ‘Ity no Zanako malalako.’” Nitsangana teo ireo mpino ireo. Ary Kristy no fanehoana an’Andriamanitra. Naneho an’i Kristy foana tamin’ny alàlan’ny Teniny Izy, satria Kristy no Teny. Nasehony foana.

<sup>21</sup> Rehefa hoy Izy...Tamin’ny andron’i Noa, Kristy no tao amin’i Noa. Mino izany ve ianareo? Hoy Noa hoe, “Ho avy ny orana. Hisy orana anankiray, ny tany dia ho potika.” Dia avy ny orana. Tsy nila fandikana anankiray izany. Avy ny orana satria Andriamanitra, tao amin’i Noa, no nanao hoe, “Ho avy ny orana.” Mpaminany anankiray izy, ary ny fahamarinana izay nelazainy dia niseho. Noho izany dia tsy nila nandika an’izany izy ireo.

<sup>22</sup> Ny sasany tamin’izy ireo mety, ny manodidina, nanao hoe, “Io lehilahy io dia tsy mahafantatra izay lazainy akory.”

<sup>23</sup> Saingy Andriamanitra no nampanantena foana, “Raha misy anankiray eo anivonareo izay ara-panahy, na mpaminany, ka izay lazainy dia miseho, amin’izay fotoana izay dia matahora azy.” Marina izany, satria marina ilay izy. Tsy maintsy mifanaraka amin’ny Teny ilay izy. Ary i Noa dia nifanaraka tamin’ny Teny. Rehefa naminany izy fa ho avy ny orana, dia avy ny orana. Tsy nila fandikana ny amin’izany, satria tena izany tokoa no nataony.

<sup>24</sup> Hoy Isaia hoe, “Hitoe-jaza ny virijiny,” dia nitoe-jaza izy. Ankehitriny, zavatra anankiray tena tsy fahita izany. Fa, hitanareo, izany dia an-jato taonany maro lasa talohan’io virijiny io nitoe-jaza.

<sup>25</sup> Tena tsy fahita izany hany ka lehilahy tsara anankiray mitondra ny anarana hoe Josefa, ny vadiny, “lehilahy marina sady tsy ta-hanala baraka azy...” Io lehilahy tsara tamin’izany andro izany io, ho nanao ahoana moa izany tamin’i Josefa rehefa nanaiky izy, namofo an’i Maria.

<sup>26</sup> Voafofo izy. Tamin’izany andro izany, ny handrava an’izany, dia tena nitovy amin’ny fijangajangana. Ary, mazava ho azy, tamin’i Josefa, izany dia tahaka ny hoe i Maria no nanandrana hanao azy ho fanakanana, na nanao azy ho fiarovana ho an’ny fahadisoany, satria indro izy efa hita fa reny anankiray, tsy mbola nanambady, nanaiky fotsiny. Ny fitaka tahaka izany,

dia ho toraham-bato ho faty; izany no tokony ho izy, araka ny lalàna.

<sup>27</sup> Ary Josefa, ny vadiny, dia lehilahy marina, tena lehilahy marina. Nino an'Andriamanitra izy. Ary rehefa njery azy izy miaraka tamin'ireo maso lehibe, maha-te-ho tia sy malemy, ka nanao hoe, "Josefa, Gabriela ilay Arkanjely no namangy ahy ka niteny tamiko fa hitoe-jaza aho, tsy mahalala lahy."

<sup>28</sup> Ankehitriny, raha nitodika fotsiny tao amin'ny Soratra i Josefa, ny mpaminany no niteny fa hanao izany izy! Izany dia Andriamanitra fotsiny mandika ny Teniny Manokana! Hitanareo? Saingy tena tsy fahita loatra ilay izy.

<sup>29</sup> Izany ilay olana ao amin'ny taona tsirairay. Vahiny amin'ny olona ny Tenin'Andriamanitra; tena tsy fahita loatra ilay Izy. Manao ny tsy fahita foana Andriamanitra. Tsy fahita ilay izy na aiza na aiza misy an'Andriamanitra. Mifanohitra amin'ny fomba fandaharan'izao tontolo izao ilay izy, satria izy ireo dia nahazo zavatra amin'ny fomba izay nieritreretany fa haha-izy azy. Saingy miditra Andriamanitra ary manao ny tsy fahita.

<sup>30</sup> "Ahoana no nahafahan'io virijiny io hitoe-jaza?" Mahitsy fo izy, nitady an'Andriamanitra izy mikasika an'izany.

<sup>31</sup> Ary avy eo dia niresaka taminy tao amin'nynofy Andriamanitra, ka nanao hoe, "Josefa, ry zanak'i Davida, aza matahotra ny hampakatra an'i Maria vadinao, fa izay nampitoe-jaza azy dia ny Fanahy Masina. Andriamanitra no nanaloka azy. Izany no nanao an'io."

<sup>32</sup> Mba voamarikareo ve hoe ahoana no nifampiraharahan'Andriamanitra tamin'i Josefa teo? Tao amin'ny fomba ambany, tao amin'ny fomban'nynofy anankiray. Ankehitriny, fantatsika fa misy nynofy, mino nynofy isika. Izaho mino nynofy. Nisy... Andriamanitra dia nifampiraharaha foana tamin'ny olona tao amin'nynofy. Saingy nynofy dia ambany, hitanareo, mety ho marina izy io na diso mandra-pahatonga azy ho voadika. Saingy tsy nila fandikana izy. Andriamanitra Izy Tenany mihitsy no niresaka nivantana tamin'i Josefa, satria tsy nisy mpaminany tao amin'ny firenena tamin'ireo andro ireo mba handika. Tsy nanana mpaminany tao nandritry nyefa-jato taona. Koa ny tsara indrindra manarakana, dia Andriamanitra no nikarakara ny fanambinana, tsara avy amin'ny Zanany Manokana, niresaka tamin'i Josefa tamin'ny alàlan'nynofy anankiray ary tsy nisy fandikana. Hoy Izy hoe, "Marina ilay vehivavy. Ilay Zavatra Masina izay mitoetra ao aminy io dia ny Zanak'Andriamanitra." Tsy nila fandikana izany.

<sup>33</sup> Andriamanitra dia manao ny Fandikany Manokana amin'ireo mahitsy, fo tsotra, lehilahy sy vehivavy izay mijery an'ilay-ilay zavatra izay zava-miafina, raha mahitsy sy tso-po ianareo ary hino, dia manana fomba anankiray Andriamanitra

ny handikana izany aminareo. Voalohany, jereo raha teny fikasana ilay izy. Raha nanana fitodihana fotsiny i Josefa ka niala tamin'ny fombafomba ary niverina tao amin'ny Baiboly, dia jereo, Isaia no nilaza fa hanao izany izy.

<sup>34</sup> Ary ireo zavatra izay voateny, sy ny Fahaterahany, ary ny rehetra mikasika an'ilay izy dia notenenin'ny Soratra, "tamin'ny alàlan'ny mpaminany masina," araka ny nolazain'i Petera. Ary tsy misy olona manana zo hametraka fandikana manokana eo amin'izany. Izany dia izay tena lazain'Andriamanitra fotsiny no hiseho. Izy no fanehoana ny Tenin'Andriamanitra nampanantenaina ho an'izany andro izany. Andriamanitra no nilaza an'izany, dia nisy izany. Vita hatreo izany.

<sup>35</sup> Hoy Jesosy... Rehefa teto an-tany Izy, rehefa tsy azon'izy ireo ny Asam-panompoany, lehibe loatra ilay izy, zavamahaga loatra, (tsy azon'izy ireo), mahagaga, raha ny marina. Tsy azon'izy ireo Izy. Hoy Izy hoe, "Zahao ny Soratra!" (Manantena aho fa tsy mampaharenina anareo aho eto, mitsoka mafy an'ity.) "Zahao ny Soratra, fa ao amin'Ireny no neverinareo fa hahazoanareo ny Fiainana Mandrakizay, ary Ireny no manambara Ahy." Hitanareo? "Ireо no Tokana izay miteny aminareo hoe Iza Aho."

<sup>36</sup> Hitanareo, nitsinjara ny Teny Andriamanitra. Io andro io no tsy maintsy ho fanehoana an'Andriamanitra, Andriamanitra (Imanoela) amintsika, "Ny Anarany dia hatao hoe Mahagaga, Mpanolo-tsaina, Andrian'ny Fiadanana, Andriamanitra Mahery, Rain'ny Mandrakizay. Ary ny Anarany dia hatao hoe *Imanoela*, 'Andriamanitra amintsika.'" Tao amin'i Davida Andriamanitra. Tao amin'i Mosesy Andriamanitra. Andriamanitra! Andriamanitra hatramin'ny farany, maneho ny Tenany ho an'izany taona izany. Saingy ity taona ity, "Hitoe-jaza ny virijiny ka hiteraka Zazalahy izy, ary Izy dia ho Andriamanitra amintsika."

<sup>37</sup> Izany no nahatonga azy ireo nanombo Azy, manao ny Tenany ho Andriamanitra, ary koa nandrava ny Sabata. Izy dia—Izy dia Andriamanitra ambonin'ny Sabata, ary Andriamanitra Izy. Ary tsy olona tsotra anankiray fotsiny Izy na mpaminany tsotra anankiray (kanefa Olona sy Mpaminany tsotra anankiray Izy), saingy Andriamanitra-Mpaminany Izy. Ary Izy no fahatanterahan'ny Teny, izany tokoa no nolazain'Andriamanitra fa Hataony. Hoy Izy, "Iza aminareo no afaka manameloka Ahy amin'ny ota? Zahao ny Soratra! Ao amin'ireny no neverinareo fa hahazoanareo ny Fiainana Mandrakizay, ary ireny no manambara Ahy." Saingy ireo fombafomban'izy ireo, dia niaina tao anatin'ny famirapiratan'ny taona hafa anankiray izy ireo.

<sup>38</sup> Tahaka ny nitoriaiko herinandro vitsivitsy lasa izay, "*Miaina ao anatin'ny famirapiratana anankiray.*" Ny famirapiratana dia "fitaratratra," ny masoandro mandefa ny taratry ny tenany, ary

sandoka izany. Ary ny famirapiratan'ny taona hafa dia taratra sandoka. Ny olona dia mandeha foana ao anatin'ny zavatra izay efa niseho taona maro lasa. Ny Loterana dia mandeha ao amin'ny famirapiratana Loterana iray. Ny tara-masoandron'i Lotera dia tsara tamin'ny androny; Wesley dia tsara tamin'ny androny; ny Pentekotista dia tsara tamin'ny androny. Miakatra amin'ny tohatra isika, miaina ao amin'ny taona hafa anankiray isika! Mandeha isika, mandeha, tsy afaka manohy mijery any aoriana isika.

<sup>39</sup> Rehefa mametraka ny tenantsika ao amin'ny zavatra isika, mihevitra isika fa vitantsika daholo ilay izy, alaintsika ny fombafombantsika hanarona; ary nety izany tamin'izany andro izany, saingy mifindra isika! Zahao ny Soratra dia jereo hoe inona no nampanantenaina ho an'ny ankehitriny, dia ho fantatsika hoe aiza no misy antsika, dia afaka miteny isika hoe aiza isika no mijoro.

<sup>40</sup> Lotera; afaka mijery ao amin'ny Soratra ianareo ka mahita ao amin'izany—ao amin'izany taonan'ny Sardisy izany, azonareo jerena marina tokoa hoe inona no nampanantenaina. Jereo hoe karazana mpitaingi-tsoavaliny inona no nivoaka, jereo hoe inona no nivoaka nitsena azy, marina tokoa, “ilay hafetsen’ny olona,” fanavaozana. Diniho i Wesley, sy ny sisa. Fa tonga nidina tao amin'ny taona Pentekotista izany, ary nidina tamin'ny alalan'io taona io, diniho hoe ahoana no nandehanany. Mijere ny Soratra dia jereo hoe aiza no misy antsika. Izany no antony nilazan'i Jesosy hoe, “Zahao ny Soratra!”

<sup>41</sup> Jereo hoe aiza no misy antsika! Izaho dia mino fa isika dia ao amin'ny Fihavian'ny Zanak'Andriamanitra mihitsy ankehitriny izao. Izaho dia mino fa isika dia ao amin'ny taonan'ny—ny tena ora izay mety Hissehoany amin'ny fotoana rehetra. Izaho dia mino fa ny Soratra no nanambara fa, fa isika dia ao amin'ny ora faran'ny tantaran'ity izao tontolo izao ity. Mahita zavatra aho izay efa volavolaingi ireo. Jereo io Fiombonambe Ekiomenika io izay mitarika ny fiangonana rehetra ao amin'izany, ao amin'ny mariky ny bibi-dia. Ary jereo ny Fanjakana Romana sy izay ataony, ary ny sisa rehetra amin'izy ireo. Jereo izy ireo mitambatra miaraka, misakana an'ilay Hazavana, mamono ny Filazantsara. Ny olona rehetra dia tsy maintsy hikambana amin'izany ary handeha ao amin'ireo fahazavany fa raha tsy izany dia tsy handeha mihitsy ianareo. Hitanareo, ao amin'ny andro farany isika. Tsy misy zavatra tavela ho antsika intsony afa-tsy ny mihazona amin'Andriamanitra ka mino ny Teniny. Ny Teniny no marina foana.

<sup>42</sup> Tao amin'ny taom-piangonana Laodikia, izany no taom-piangonana tokana, avy tamin'izy rehetra, izay nametrahana an'i Kristy tany ivelan'ny fiangonana. Tany ivelany Izy, nandondona. Inona no niseho? Io Fiombonambe Ekiomenika io no handroaka Azy. Ny Baiboly no nilaza fa tsy maintsy ho any

ivelany Izzy, ary dia izany Izzy. Nanakana inona izany? Ny Teny. Ary Izzy no Teny, Izzy foana no Teny, ary ho Teny foana Izzy izao hariva izao! Izzy no Teny.

<sup>43</sup> Hoy ny Baiboly hoe, “Ny Teny dia maranitra, mahery noho ny sabatra roa-lela,” Hebrewo, ny toko faha-4, “mpamantatra ny eritreritra sy ny fisainan’ny fo.” Izany ny Teny! Tokony ho fantatr’izy ireo hoe Iza Izzy rehefa nilaza an’izany Jesosy tamin’io andro io.

<sup>44</sup> Diniho izay Nataony. Indray andro dia nitsangana teo Izzy, ny fiandohana voalohan’ny Asam-panompoany. Nisy lehilahy iray tonga teo Aminy, tamin’ny anarana hoe Simona, Simona Petera. Ary raha njery Azy Petera ka—ka nahita Azy, nilaza taminy Jesosy hoe, “Ny anaranaao dia Simona ary ianao dia zanak’i Jona.” (Tokony ho fantany fa i Mosesy no nilaza hoe, “Ny Tompo Andriamanitraiseo no hanangana Mpaminany tahaka ahy, ary Izzy no tsy maintsy henoinareo.”) Ary indro nisy Lehilahy anankiray izay tsy mbola nahita azy mihitsy teo amin’ny fiaianany, nanao hoe, “Ny anaranaao dia Simona ary ianao dia zanak’i Jona.” Nahoana, fantany tsara teo fa izany dia tsy ho... . Tsy nanana mpaminany izy ireo nandrity ny an-jato taonany, ary indro nisy Lehilahy anankiray niteny taminy hoe iza izy. Tsy mahagaga raha afaka nandray izany izy!

<sup>45</sup> Filipo, tamin’izany fotoana izany, dia nandeha ary—ary nahita an’i Natanaela teo ambanin’ny hazo anankiray, ary nitondra azy nankeo amin’i Jesosy. Hoy Jesosy hoe “Indro ny Isiraelita izay tsy misy fitaka ao aminy.”

Hoy izy hoe, “Raby, oviana no mba Nahafantaranao ahy?”

<sup>46</sup> Hoy Izzy hoe, “Talohan’ny niantsoan’i Filipo anao, raha teo ambanin’ny hazo ianao, dia efa nahita anao Aho.”

<sup>47</sup> Hoy izy hoe, “Raby, Ianao no Zanak’Andriamanitra! Ianao no Mpanjakan’ny Isirael.” Fantany fa izany io! Inona? Tsy nila fandikana izany, Jehovah no niteny an’izany!

<sup>48</sup> Teo dia nitsangana ireo izay tsy nino an’izany. Hoy izy ireo hoe, “Belzeboba io Lehilahy io. Izzy dia manana—Izzy dia manana karazana fitaka izay Hanintonany. Izzy—Izzy dia mpanao hatsarana, na zavatra anankiray.”

<sup>49</sup> Nijery azy ireo Jesosy, ka nanao hoe, “Nahoana, ianareo izay miteny manohitra ny Zanak’olona, dia havela ianareo amin’izany. Saingy rehefa tonga ny Fanahy Masina hanao zavatra mitovy amin’izao, ny miteny manohitra an’Izany, tsy havela mihitsy ianareo amin’izany, amin’izao fiaianana izao na ny fiaianana ho avy.” Naminany ny amin’ny androntsika Izzy, ny andro izay ho hitantsika. Fa Izzy no tsy miova omaly, anio, ary mandrakizay.

Tsarovy, izany no Jesosy Kristy izay tao amin’i Mosesy.

<sup>50</sup> Izany no Jesosy Kristy izay tao amin'i Davida. Rehefa i Davida, ilay zanak'i...Niakatra teo an-tendrombohitra i Davida, mpanjaka nolavina anankiray, ary nitomany an'i Jerosalema, izay tsy inona akory fa Kristy tao aminy. Fa teo amin'ny valon-jato taona taty aoriana, dia nipetraka teo amin'ny Tendrombohitra Oliva ilay Zanak'i Davida ka njery an'i Jerosalema dia nitomany, ary nanao hoe, "Jerosalema, Jerosalema, impiry moa Aho no ta-hanangona anao tahaka ny fanomban'ny akoho ny zanany, saingy tsy nety ianareo!"

<sup>51</sup> Raha tao an-tranomaizina Josefa, dia Jesosy izany. Raha namidy teo ho eo amin'ny volafotsy madinika telopolo teo izy, dia Jesosy izany. Raha natao ho olon'i Potifara izy, dia Jesosy izany. Rehefa nipetraka teo amin'ny tànana ankavan'an'i Farao izy. Ary rehefa lasa izy, ny olona rehetra...naneno ny trompetra, ary ny olona rehetra tsy maintsy nandohalika, dia Jesosy izany. Tsy nisy olona afaka nankao amin'i Farao raha tsy amin'ny alàlan'i—alàlan'i Josefa ihany; tsy misy olona afaka mankao amin'Andriamanitra, amin'ny alàlan'i Jesosy ihany. Jesosy io, ilay Teny voaminany ho tanteraka, niteny tao amin'ny aloka sy tandindona.

<sup>52</sup> Rehefa teto an-tany teto Jesosy, dia nanao ny zavatra mitovy tamin'izay nataon'ireo mpaminany Izy, izany no antony nahafantaran'izy ireo fa Izy no fanehoan'Andriamanitra ny Teniny. Tsy nila nadika izany.

<sup>53</sup> Rehefa nahita an'izany i Natanaela, dia niankohoka izy, nanao hoe, "Ianao no Mpanjakan'ny Isirael, ilay Zanak'Andriamanitra, ilay Mpanjakan'ny Isirael. Fantatray Ianao, tsy misy olona mahay manao an'izany."

<sup>54</sup> Tonga i Nikodemosy tamin'ny alina, niteny zavatra toy izany tamin'ireo Fariseo. Saingy, hitanareo, saingy voasaringotra loatra ao amin'ny Fivoriambé Ekiomenikany izy ireo hany ka tsy nety nanaiky an'Izany. Nasehony izay nolazain'izy ireo, hoy izy, "Raby, izahay..." Iza ilay "izahay"? Ny fivoriambeny! "Izahay dia mahafantatra fa Ianao dia mpampianatra avy amin'Andriamanitra, satria tsy misy olona mahay manao an'ireo zavatra ireo raha tsy Andriamanitra no momba Azy." Fantatr'izy ireo Io, fantatr'izy ireo fa izany Io, saingy voasaringotra loatra tao anatin'io izy ireo.

<sup>55</sup> Ary Andriamanitra, tamin'ny efapolo taona lasa, dia nanozongozona an'ity firenena ity niaraka tamin'ny batisan'ny Fanahy Masina, nefà dia mbola any ivelan'Izany foana ny lehilahy sy vehivavy satria voasaringotra ao anatin'ny zavatra anankiray mitovy izy ireo, miaina ao anatin'ny famirapiratan'ny andro hafa anankiray. Inona ny olana? Ny tsirairay dia te-ho Metodista, Batista, Presbyterana, Loterana, na zavatra hafa. Hitanareo, famirapiratana izany.

<sup>56</sup> Niaina tao anatin'ny famirapiratan'ny andron'i Mosesy izy ireo. Inona no nolazainy? Hoy izy hoe...Hoy izy ireo hoe, "Mpianatr'i Mosesy izahay."

<sup>57</sup> Hoy Izy hoe, "Raha nahafantatra an'i Mosesy ianareo, dia ho nahafantatra Ahy. Nanoratra ny Amiko i Mosesy!"

<sup>58</sup> Raha nahafantatra an'i Lotera ianareo, dia ho nahafantatra an'izao taona izao! Raha nahafantatra ny Metodista ianareo, dia ho nahafantatra an'izao taona izao! Fa nanoratra an'izao taona izao Kristy! Ireo Teny izay natao ho tanteraka no tsy maintsy tanteraka amin'izao taona izao. Tsy mila olona handika Azy izany, Andriamanitra no manao ny Fandikany Manokana. Andriamanitra no mandika ny Tenany, satria Izy irery no Tokana izay mahay mandika an'Izany. Ireo teny fikasan'Andriamanitra foana no manamarina izay Nolazainy, ary izany no fandikana.

<sup>59</sup> Ankehitriny, Jesosy, (mba hananana fotoana), hoy Jesosy, ao amin'ny Masindahy Jaona, ny toko faha-14, ny andininy faha-12, "Izay mino Ahy, ireo asa Ataoko no hataony koa." Nilaza an'izany ve Izy? Marina izany. Tsy mila fandikana izany. Rehefa manao an'izany asa izany ny olona, dia Andriamanitra izany. Izany tokoa!

<sup>60</sup> Hoy koa Izy ao, "Tahaka ny tamin'ny andron'i Lota, dia ho toy izany koa amin'ny fihavian'ny Zanak'olona." Nilaza an'izany Jesosy. Nilaza an'izany ve Izy? Izany tokoa, nilaza an'izany Izy! Tsy mila fandikana izany.

Hoy izy ireo hoe, "Eny, ny dikan'izany dia..."

<sup>61</sup> Izany dia midika tanteraka an'izay Nolazainy! "Tahaka ny tamin'ny andron'i Lota, dia ho toy izany koa amin'ny fihavian'ny Zanak'olona." Inona ny tamin'ny andron'i Lota? Ndao isika hiverina vetivety fotsiny, hahita izay nataon'izy ireo.

<sup>62</sup> Nisy sokajin'olona anankitelo tamin'ny andron'i Lota: ny mpino, ny mody mpino, ary ny tsy mpino. Izany no ao amin'ny olona maro, zavatra mitovy.

Mahita isika fa ireo Sodomita no tsy mpino.

Lota no mody mpino.

<sup>63</sup> Abrahama no mpino. Izy no tokana namarinin'ilay fanekena. Izy no tokana izay nitady ny zanaka nampanantenaina. Izy no tokana izay niandry an'izany. Amena. (Tsy manao "amena" amin'ny tenako aho. *Amena* dia midika "Ho tanteraka anie izany!") Ary marina izany. Tsy tany Sodoma i Abrahama. Teny ambony i Abrahama ary tany ivelan'i Sodoma. Izy no tandindon'ilay Fiangonana ara-panahy ankehitriny.

<sup>64</sup> Lota no tandindon'ny fiangonana anaram-piangonana tany Sodoma hatramin'izao. Diniho, ny Baiboly dia nilaza fa, "Ny fahotan'i Sodoma dia nanavesatra ny fanahiny marina isan'andro." Nahoana izy no tsy nanana fahasahiana ampy hijoroana hanohitra an'izany? Misy betsaka ny lehilahy tsara

mipetraka ao amin'ny fiangonana ankehitriny, mijery ary mahita vehivavy miaraka amin'ny sorta sy lehilahy manao an'ireo zavatra ireo, ary mandeha ireo mpikambany, milalao golfa ny Alahady, sy fetim-pitsangatsanganana, ary milomano sy ny sisa, raha tokony hanatrika any am-piangonana. Mipetraka any an-trano ny Alarobia hariva, mijery televiziona, raha tokony hanatrika any am-piangonana. Manam-paniriana hiteny zavatra mikasika an'izany izy ireo, saingy ilay baoritra no handroaka azy ireo. Fa misy inona? Lota indray izany, mijery avy eo amin'ny varavarankeliny ka mahita ny fahotana, ary matahotra ny hiantso ny fahotana hoe "fahotana"!

<sup>65</sup> Tsy tao anatin'ny loton'izy ireo i Abrahama, tany ivelan'izany izy. Izy no tandindon'ilay Fiangonana ara-panahy. Ankehitriny diniho izay niseho teo amin'ilay andro faramy mihitsy, talohan'ny nilatsahan'ilay afo mihitsy. Ary izy ireo dia Jentilisa. Izany dia manome tandindona mialohan'ny filatsahan'ny afo eo amin'izao tontolo izao Jentilisa ankehitriny, rehefa ho ravana ireo fanjakana ka ho dorana izy ireo. "Hirehitr'afy ny Lanitra," hoy ny Tompo, "ary hirehitra amin'ny hafanana mivaivay izy ireo." Izany no tandindon'io.

<sup>66</sup> Ankehitriny ndao isika hanao sarin'izy ireo. Io i Abrahama efa any ivelany, tsy tao anatin'i Sodoma, tany ivelan'i Sodoma izy. Lota no mbola tao anatin'i Sodoma.

<sup>67</sup> Zavatra hafahafa, indray maraina mafana, tokony ho teo amin'ny iraika ambin'ny folo teo izany, nahita lehilahy anankitelo tonga izy, lehilahy tsotra, nandeha teny an-dàlana, ilay làlan-kely. Nipetraka teo ambanin'ny hazo oka i Abrahama, nampiala sasatra ny tenany. Taty ivelany izy, angamba niaraka tamin'ireo biby fiompy io maraina io, no niditra, saiky tamin'ny mitataovovanana. Ary nahita lehilahy anankitelo tonga izy. Ary nisy zavatra mikasika an'ireo lehilahy ireo, fa, nampaneno lakolosy. Oh, oadray!

<sup>68</sup> Misy zavatra foana mikasika an'Andriamanitra, rehefa tonga eo anivor'ny olona Izany, mampaneno lakolosy Izany. Fantatr'izy ireo Izany. Misy zavatra miteny amin'izy ireo, misy fanamarinana anankiray eo.

<sup>69</sup> Nihazakazaka haingana i Abrahama, ka nanao hoe, "Tompoko, mandrosoa ary aoka aho haka rano kely, hitatitra izany ary hanasa ny Tongotrao, ka hanome Anao sombi-mofo, ary avy eo Ianao dia afaka manohy ny Lâlanao." Dia nihodina tao ambadika izy. Nihazakazaka tany amin'ny biby fiompy izy ary naka zanak'omby anankiray ka novonoiny izany, naka mpanompo anankiray hikarakara an'izany. Nankao amin'ny trano lay, teo ambaniny teo, ary naka an'i Saraha hametafeta koba, nanao karazana, na karazana hena, nanao karazana mofo, ary nanao mofomamy teo ambonin'ny fatana. Nitondra an'ireo ka nandroso. Raha mbola nipetraka teo izy, nihinana,

dia nanomboka nahamarika izy ireo, fa io Lehilahy io dia tsy nitsahatra njery an'i Sodoma. Ary hoy Izy...

<sup>70</sup> Ny roa tamin'izy ireo, tsarovy, no nidina tany Sodoma. Ny roa no nandeha tany Sodoma. Aza diso an'ity azafady. Mandray an'izay nolazain'i Jesosy aho. Ny roa tamin'izy ireo dia nandeha tany Sodoma hitondra an'i Lota hivoaka sy izay efa vonona ny ho entina mivoaka tao. Ary izy roa izay nidina tany ireo, dia nidina ary nitory teny. (Ary nisy Anankiray nijanona teo niaraka tamin'i Abrahama. Diniho ilay famantarana izay Nataony.) Nanana famantarana izy ireo tany, nisy...ireo Sodomita dia nasian'ny fahajambana. Ny fitoriana ny Filazantsara dia manajamba foana ny tsy mino. Ary mariho hoe inona no nanao an'izany.

<sup>71</sup> Ankehitriny, nisy Anankiray nitsangana teto ary nanao ny famantarana teo anatrehan'i Abrahama.

<sup>72</sup> Ankehitriny, efa mba voamarikareo ve, ny mpahay tantara, araho ny Soratra, araho ny tantara, tsy nisy mihitsy fotoana anankiray tao amin'ny taonan'ny fiangonana mba nisy lehilahy nandeha tany amin'ny fiangonana manana anarana teto amin'izao tontolo izao, tao amin'ireo anaram-piangonana, tsy nisy mihitsy lehilahy anankiray ka ny anarany niafara toy ny hoe Abrahama, h-a-m, taloha. Saingy ankehitriny dia manana anankiray izy ireo, G-r-a-h-a-m. Marina izany. Nidina nankeo, niantso azy ireo hivoaka. Manao asa tsara izy amin'ny alàlan'izany. Graham, Billy Graham, mpanompon'Andriamanitra tany teo anivon'ireo anaram-piangonana, politisiana, sy ny sisa, nanamontsana an'izany.

<sup>73</sup> Indray andro rehefa tian'izy ireo hirotsaka Filoham-pirenena izy, dia nolaviny marindrano izany. Andriamanitra, tahio izy amin'izany. Nahoana, ireo orinasan'izy ireo mpanao toaka, tsy nahazo fototra voalohany mihitsy izy araka ny tokony ho izy. Nandany an-tapitrisany dolara izy ireo, satria namoaka an'izany izy ireo na izany aza, ireo orinasan'ny sigara sy ny zavatra tahaka an'izany. Hitanareo, tany ivelan'izany izy amin'ny maha-irak'Andriamanitra azy ho an'ireo Sodomita. Tena marina izany.

<sup>74</sup> Saingy tsarovy, nisy Anankiray izay nijanona teo ambony teo niaraka tamin'i Abrahama, Lehilahy hafa, tsy ireo anankiroa izay nidina tany tahaka ny evanjelista moderna anankiray izay nidina tany history teny. Mariho, nisy Anankiray nijanona teo ambony teo. Ny roa nidina tany amin'itsy lâlana itsy, ary ny Anankiray nijanona eto niaraka tamin'i Abrahama. Ary ilay Anankiray izay nijanona niaraka tamin'i Abrahama no nanome azy famantarana iray.

<sup>75</sup> Ankehitriny diniho, ny anarany taloha dia "Abrama" ary ny vadiny dia "Saray," iray andro na roa talohan'izany mihitsy. Niseho taminy Andriamanitra ka niteny taminy hoe, "Hovaiko

ny anaranaao ankehitriny avy amin'ny Abrama ho Abrahama.” [Amin’ny teny Anglisy dia “Abraham.”—Mpand.] (Hitanareo, G-r-a-h-a-m dia litera enina, olona.) Fa A-b-r-a-h-a-m dia fito, litera fito; h-a-m, miafara amin’ny h-a-m anankiray.

<sup>76</sup> Ankehitriny, tao amin'ilay Fiagonana ara-panahy teo, dia nisy Anankiray teo ho an'i Abrahama, ary mariho izay Nolazainy. Hoy Izy hoe, “Abrahama,” (tsy hoe “Abrama”) “Abrahama, aiza ny vadinao” (tsy hoe “S-a-r-r-a”) “S-a-r-a-h-a? Aiza Saraha vadinao?”

<sup>77</sup> Diniho izay nolazainy hoe, “Ao anaty trano lay Aorianao izy.”

<sup>78</sup> Ary hoy Izy hoe, “Hamangy anao Aho. Ho avy hamangy anao Aho.” Hitanareo izany mpisolo tena izany, ilay Tokana, araka ny teny fikasana izay Nataony. Andriamanitra izany! Hoy Izy hoe, “Ho avy hamangy anao Aho.”

<sup>79</sup> Ary Saraha, (amin’ny fomba izay hahalantsika rehetra) dia nihomehy anakampo, tamin’ny tenany, hoy izy hoe, “Izaho, vehivavy antitra anankiray, zato taona, ny tompoko” (izay Abrahama izany) “antitra koa, izao androm-piaiany efa lasa izao ho tahaka ny olona tanora.” Hoy izy, “Nahoana, tsy mety hanana hafaliana tahaka an’izany intsony izahay, izaho antitra ary izy antitra.” Ary hoy izy, “Tsy mety hanana an’izany izahay.” Ary hoy izy, “Ahoana? Tsy hisy izany zavatra izany!”

<sup>80</sup> Ary ilay-ilay Lehilahy (Andriamanitra ao amin’ny nofon’olombelona) nanao hoe, “Nahoana i Saraha no nihomehy sy nisalasala, milaza an’izany zavatra izany?” Tao anaty trano lay, Taoriany.

<sup>81</sup> Ankehitriny diniho, raha tsy mbola ilay asam-panompoana izay nananan'i Jesosy Kristy ihany izany! Nijery tany amin’ny mpanatrika Izy dia hitany ny fisain’izy ireo. Niteny tamin'i Petera Izy hoe iza izy ary iza no anaran'ny rainy. Niteny tamin'i Natanaela.

<sup>82</sup> Niteny tamin'ilay vehivavy teo amin’ny fantsakana, rehefa nilaza izy... Hoy Izy hoe, “Ndeha maka rano ho Ahy,” na “Itondray rano Aho.”

<sup>83</sup> Hoy izy hoe, “Tompoko, tsy fanao Aminaon ny miresaka amin’ny...ianareo Jiosy miresaka amin’ny Samaritana. Tsy manana fifampiraharohana isika.”

<sup>84</sup> Hoy Izy, “Saingy raha fantatrao hoe Iza no niresaka taminao, dia ianao no hangataka rano Amiko.” Nitohy ilay fifampiresahana. Hoy Izy hoe, “Mandehana alao ny vadinao dia mankanesa eto.”

Hoy izy hoe, “Tsy manambady aho.”

Hoy Izy hoe, “Marina ny voalazanao, saingy efa nanana dimy ianao.”

Hoy izy hoe, “Tompoko!”

<sup>85</sup> Jereo ilay fahasamihafan’io sy ireo—ireo mpisorona tamin’izany andro izany, ilay favoriambe niaina tao anatin’ny famirapiratan’ny andro hafa anankiray. Hoy izy ireo hoe, “Ny devoly izany!” Tsy maintsy namaly zavatra anankiray ho an’ny fikambananizy ireo, satria nila an’izany io.

<sup>86</sup> Saingy inona no nataon’ity vehivavy mahantra kely ity, io Voa voafidy mialoha nandry tao am-pony io... Narary sy rerak’io karazan-javatra io izy, nandeha teny an-dàlambe izy amin’ny maha-mpijangajanga azy. Saingy rehefa hitany Izany, dia hoy izy hoe, “Tompoko, hitako izao fa Mpaminany Ianao. Efa tsy nanana anankiray izahay efa-jato taona lasa, ary nolazaina taminay fa rehefa tonga ny Mesia dia izany no zavatra izay Hataony.” Oh, oadray! Io Voa nandry tao io dia nitsambikina ho amin’ny fiainana! Nahoana? Tsy nila fandikana izany.

<sup>87</sup> Hoy Jesosy hoe, “Izaho izay miresaka aminao no Izzy.” Tsy nila fandikana izany. Nanao an’ilay fahagagana Izzy ary nanamarina fa Izzy ilay Mesia, amena, ary mitondra fanambarana tanteraka an’izay nampanantenain’Andriamanitra (“Ny Tompo Andriamanitraiseo no hanangana Mpaminany iray tahaka ahy,” hoy Mosesy). Inona izany? Fanamarinana anankiray ny Soratra!

<sup>88</sup> Nihazakazaka nankany an-tanàna izy, ka hoy izy hoe, “Avia, hizaha Lehilahy anankiray Izay niteny tamiko ny zavatra nataoko. Tsy izao ve no tena Kristy? Tsy Izzy ve izany? Noteneniny tamiko izay nataoko.”

<sup>89</sup> Ankehitriny mariho, Jesosy, Izzy io tao amin’io Lehilahy izay nanatodika ny Lamosiny tany amin’ilay trano lay io ka niteny tamin’i Saraha izay noeritreretiny mikasika an’izany tao anatin’ilay trano lay.

<sup>90</sup> Ny Tenin’Andriamanitra dia milaza, ao amin’ny Hebreo, ny toko faha-4, fa... Izao no Lazainy, “Ny Tenin’Andriamanitra dia mahery ary maranitra noho ny sabatra roa lela, mampisaraka ny tsoka sy ny taolana, ary mpamantatra ny eritreritra sy ny fisainan’ny fo.” Izany ny Teny! Ary isaky ny nisy mpaminany anankiray tonga, dia tonga niaraka tamin’ny Teny izy, ary izy no Teny ho an’izany taona izany. Ary inona no nataon’izany? Mpaminany anankiray izay namantatra ny fisainana izay tao anatin’ny fo.

<sup>91</sup> Nanao an’izany io tao amin’i Jesosy Kristy satria Izzy no fahafenoan’ny Teny.

<sup>92</sup> Ary hoy Jesosy hoe, “Tahaka ny tamin’ny andron’i Sodoma, dia ho toy izany koa amin’ny fihavian’ny Zanak’olona.” Ny Fanahin’Andriamanitra dia ho tonga eto ambonin’ny tany amin’ny endrika olombelona, Andriamanitra voaseho ao amin’nynofon’olombelona (Amena! Hitanareo ve izany?), ary hanao zavatra mitovy tamin’izay nataon’Andriamanitra tao amin’nynofon’olombelona tany Sodoma. Tsarovy, niandry ny

zanaka nampanantenaina izy ireo. Ary, taorian’izany mihitsy, dia tonga ilay zanaka nampanantenaina. Io no famantarana farany izay hitan’i Sodoma sy ny tarik’i Abrahama nialohan’ny nahatongavan’ilay zanaka nampanantenaina. Voamarikareo ve izany? Ary ankehitriny dia tonga amin’izany ora izany ilay Fiangonana ara-panahy.

<sup>93</sup> Nisy olona nanao hoe, “Rahalahy Branham, nilaza ve ianao fa ‘Andriamanitra izany?’”

<sup>94</sup> Ny Baiboly no nilaza, Andriamanitra Izany! Tsy mila fandikana izany. Elohimia Izy. Izany no niantsoan’i Abrahama Azy. Ny mpamaky Baiboly rehetra dia mahafantatra an’izany. *Elohimia*, “ilay fahampiana rehetra Tokana.” Izy no Voalohany, ny Farany; ny Fiandohana, ny Fiafarana. Elohimia! Abrahama no niantso Azy hoe “Elohimia.” Andriamanitra (amin’ny litera lehibe ao amin’ny Hebreo), Elohimia; tahaka ny tamin’ny fiandohana mihitsy, “Andriamanitra,” Elohimia.

<sup>95</sup> Izy no Elohimia voaseho tao amin’nynofon’olombelona, nanao akanjon’olombelona, nihinana sakafon’olombelona. Amena! Famantarana anankiray amin’ny andro farany fa Andriamanitra dia hiseho indray eo anivon’ny Olony ao amin’nynofon’olombelona! Amena! Hoy Jesosy hoe, “Ireo asa izay Ataoko no hataonareo koa. Ary tahaka ny tamin’ny andron’i Sodoma, dia ho toy izany koa amin’ny fihavian’ny Zanak’olona.” Amena! Tsy mila fandikana izany; mila fanehoana izany, izany no ilain’io. Amena. Mino an’izany ve ianareo?

Ndao isika hanondrika ny lohantsika.

<sup>96</sup> Rainay An-danitra, atolotray Anao ny Teny fikasanao izao hariva izao fa Ianao no niteny an’ireo zavatra ireo. Nampanantena azy ireo Ianao. Tsy misy afaka manao ny Teninao ho velona afa-tsy Ianao. Hoy Ianao hoe, “Aoka hisy mazava,” dia nisy mazava. Tsy misy tokony handika an’izany, voaseho izany.

<sup>97</sup> Raha nanonona ny Isaia izahay, ilay mpaminany, “Hitoe-jaza ny virijiny,” dia nitoe-jaza izy; tsy mila fanehoana izany, nitoe-jaza izy. Izany no nitranga.

<sup>98</sup> Hoy Ianao, rehefa ho tonga Izy dia ao Betlehema Izy no ho teraka, “Tao Betlehema, Jodia. Tsy kely indrindra amin’ny andrianan’ny Joda ve ianao, ao Isirael? Fa avy aminao no hivoahan’ny Mpanapaka ny Oloko.”

<sup>99</sup> Ny zavatra izay Hataony, izay Niantsoantsoany teo amin’ny hazo fijaliana, nahoana Izy no voaheloka, nofantsihana ny Tongony sy ny Tànanay; “Izy dia voalefona noho ny fahadisoantsika, sy notorotoroina noho ny helotsika; ny fampijaliana ho an’ny fiadanantsika natao teo Aminy; ny dian-kapoka Taminy no nahasitranana antsika.”

<sup>100</sup> Ahoana no nilazan’io Davida io hoe, “Tsy Avelako ho any amin’ny fiainan-tsi-hita ny Fanahiny, ary tsy Avelako ho tratry

ny lo ny Iray Masiko.” Ary tamin’ny andro fahatelo, talohan’ny nahatongavan’ny roa amby fitopolo ora hahalo ny Vatany, dia hoy ny Tenin’Andriamanitra hoe, “Hitsangana Izy.” (Nilaza izy ireo fa nangalarin’izy ireo ny Vatany; mbola mino an’izany izy ireo.) Fa izahay dia mino, Tompo, ny Teninao! Voaseho Izany. Jesosy Kristy dia nitsangana ary hoy Izy hoe, “Izaho ho . . . Indro, Izaho momba anareo mandrakariva, mandra-pahatongan’ny fahataperan’izao tontolo izao aza.”

<sup>101</sup> Mino izahay fa eto Ianao izao hariva izao. Mino izahay fa mbola Jesosy Kristy hatrany foana Ianao izao hariva izao, eto, tahaka ny naaha-Anao tamin’izany. Ary mitady maso fotsiny Ianao, tànana, tongotra, vava, fanahy, vatana, izay Azonao ampiasaina haneho ny Tenanao. Andriamanitra, hamasino izahay izao hariva izao, mba hahafahanay mahita an’ilay Jesosy Kristy velona miaina eo anivonay. Avelao Izy ho tonga! Avy eo dia hiseho, tahaka an’ilay hanoanan’ireo Grika izay tonga tamin’izany andro izany, ka nanao hoe, “Tompoko, te-hahita an’i Jesosy izahay.” Ary tsy maintsy nahita Azy izy ireo. Oh, fientanam-po toy ny inona izany raha njery Azy izy ireo!

<sup>102</sup> Andriamanitra, Ianao no tsy miova anio. Ary Ianao no nampanantena fa raha noana izahay dia hahita Anao izahay. “Vetivety foana, dia tsy hahita Ahy izao tontolo izao” (ny tsy mpino); “fa ianareo kosa hahita Ahy, satria homba anareo Aho, ho ao aminareo aza, mandra-pahatongan’ny fahataperan’izao tontolo izao.” Fantatray fa Ianao no tsy miova omaly, anio, ary mandrakizay.

<sup>103</sup> Tompo, voalaza ireo Teny, voasoratra izany, ankehitriny aoka ho tanteraka izany, ho an’ny Voninahitr’Andriamanitra, mba hampiseho fa mihazona ny Teniny Izy. Amena. Andriamanitra hitahy anareo.

<sup>104</sup> Hiantso laharam-bavaka aho. Mino aho fa i Billy no nilaza fa nanome karatra fangataham-bavaka izy, iray ka hatramin’ny zato, na zavatra tahaka an’izany. Tsy eto izy izao ankehitriny izao. Dia . . . Inona ilay nomeraon’ny karatra . . . Aoka ny olona hijery ny aorian’ny anareo . . . Izany—izany dia manana nomerao sy—sy litera (A, B, C, D, na . . .). Inona ilay izy, A? Eny àry.

<sup>105</sup> Ndaو alaintsika ny A, nomerao iray, roa, telo, efatra, dimy. Manomboha fotsiny mitsangana tahaka an’izao. A, nomerao iray, nomerao roa, nomerao telo, nomerao efatra. Efatra, tsy hitako mitsangana izany. Karatra fangataham-bavaka nomerao efatra. Iray, roa, telo. Vavaka . . . Angamba tsy afaka mitsangana izy ireo. Raha tsy afaka izy ireo, aoka ny olona hijery ny karatry ny eo akaikinareo, mety manana karatra izy nefo tsy afaka mitsangana izy. Haingakaingana ankehitriny. Iny izy iny, efatra. Dimy, karatra fangataham-bavaka nomerao dimy. Enina, fito, valo, sivy, folo, iraika ambin’ny folo, roa ambin’ny folo. Manomboha mitsangana eto fotsiny ankehitriny vao voaantsso

ny nomeraonareo. Nomerao iray, roa, telo, tonga dia tongava eto fotsiny. Karatra fangataham-bavaka nomerao iray, roa, telo, efatra, dimy, enina, fito, valo, sivy, folo, iraika ambin'ny folo, raiso fotsiny ny toeranareo. Iraika ambin'ny folo, roa ambin'ny folo, telo ambin'ny folo, efatra ambin'ny folo, dimy ambin'ny folo, enina ambin'ny folo, fito ambin'ny folo, valo ambin'ny folo, sivy ambin'ny folo, roapololo, iraika amby roapololo, roa amby roapololo, telo amby roapololo, efatra amby roapololo, dimy amby roapololo. Misy olona tsy afaka . . .

<sup>106</sup> Mahita lehilahy tanora anankiray aho ao anatin'ny sezamisy kodiarana iry aoriania iry. Raha voaantso ny nomeraonao, anaka, ary—ary raha tsy afaka ianao . . . eny, tazony fotsiny ny tanganao, ho hitanay izay hahatonga anao eto. Hitanareo?

<sup>107</sup> Firy ny ato no tsy manana karatra fangataham-bavaka kanefa marary ianareo? Aoka ho hitanay ny tanganareo, n'aiza n'aiza. Eto mihitsy, marina izany, ataovy ambony ny tanganareo. Mino ve ianareo? Raha mbola manangona azy hiaraka izy ireo, mino an'Izany ve ianareo, fa Izy no tsy miova omaly sy mandrakizay? Firy? Diniho ireo mpitoriteny, tsy milaza ve ny Soratra ankehitriny, ry rahalahy, fa Izy no Mpisoronabe izay azo kasihan'ireo fahalementsika? Marina ve izany? Firy no mino an'izany, atsangano ny tanganareo? Izy no Mpisoronabe izay azo kasihan'ireo fahalementsika.

<sup>108</sup> Koa raha ny Baiboly no manao hoe, “Izy no tsy miova omaly sy mandrakizay,” dia firy no mino an’izany? Koa ahoana no Fiasany anio? Tsy mantsy hiasa tahaka ny Niasany omaly Izy. Marina ve izany? Aiza Izy izao hariva izao? Mipetraka eo an-tanana ankavanana ny Fiandrianany, ny Vatany; ato amin’ity trano ity ny Fanahy Masina, hampahafantatra Azy.

<sup>109</sup> Mariho, ankehitriny jereo. Inona no niseho raha nisy olona nikasika ny Lambany tany, vehivavy anankiray indray andro? Tsy nanana karatra fangataham-bavaka izy, hoy isika, saingy nikasika ny Lambany izy. Ary rehefa nikasika ny Lambany izy, dia nitodika Jesosy ka nanao hoe, “Iza no nikasika Ahy?”

<sup>110</sup> Niteny Azy i Petera, ka nanao hoe, “Nahoana, Tompo, tahaka ny tsy dia mety loatra izany. Nahoana, ny olona rehetra miezaka mikasika Anao. Nahoana no milaza hoe, ‘Iza no nikasika Ahy?’”

<sup>111</sup> Hoy Izy hoe, “Saingy Hitako fa niha-reraka Aho.” Firy no mahafantatra an’izany? *Hery*, izay midika hoe “tanjaka,” no niala Taminy. “Niha-reraka Aho, nisy olona nikasika Ahy tamin’ny karazana fikasihana hafa.” Ary nitodika Izy ka njery ny mpanatrika mandra-Pahitany hoe taiza io fantson’ny finoana io.

<sup>112</sup> Ny olona rehetra dia nametraka ny tanganany nanodidina Azy, “O Raby, mino Anao izahay,” sy io rehetra io.

<sup>113</sup> Saingy nisy olona anankiray izay tena nino an'Izany. Ary nokasihiny ny Akanjony ka nino fa sitrana izy, satria niteny tao am-pony izy fa raha afaka manao an'io izy dia izany no hiseho.

<sup>114</sup> Nitodika Izy ka njery ny mpanatrika mandra-Pahitany azy, ary hoy Izy...niteny taminy fa nitsahatra ny ràny nivoaka ary sitrana izy. Marina ve izany? Ankehitriny, izany no fomba Nataony, tao amin'ny olona mpanatrika.

<sup>115</sup> Ankehitriny, manambara aho fa tsy maty Izy, mbola tena velona Izy anio tahaka ny mbola na ha-izy Azy. Ary ny Baiboly nilaza, Jesosy no nilaza, Izy Tenany, "Tahaka ny tamin'ny andron'i Sodoma, dia ho toy izany koa amin'ny fihavian'ny Zanak'olona."

<sup>116</sup> Ankehitriny jereo, tsy maninona izay karazana fanomezam-pahasoavana izay ananan'Andriamanitra eto ambony eto, tsy maintsy hisy anankiray ery ambany ery, ihany koa, hamaly an'izany. Nandeha tao an-tanàna anankiray Izy, hoy ny Baiboly hoe, "Maro ny zavatra tsy Azony natao noho ny tsy finoan'izy ireo." Marina ve izany? Mitovy amin'izany anio. Tsy maintsy mino Azy ianareo. Tsy maintsy mino Azy fotsiny ianareo. Izay no fomba tokana hahavitanareo.

<sup>117</sup> Vonona ve ny laharam-bavaka? Ankehitriny, ny olona rehetra aoka hanaja mandritry ny folo minitra fotsiny. Tsy fantattro na afaka haharitra aho eto, efa dimy amby roapolo na telopolo minitra aho izay no nitsangana teto. Saingy ankehitriny, ao amin'ny laharam-bavaka, ny tsirairay aminareo eto amin'ny laharam-bavaka izay mahafantatra fa tsy mahalala anareo aho, ary izaho tsy mahafantatra na inona na inona mikasika anareo, dia atsangano ny tånanareo. Ny tsirairay ao amin'ny laharam-bavaka.

<sup>118</sup> Ankehitriny ny ao amin'ny mpanatrika, izay mahafantatra fa tsy mahalala na inona na inona mikasika anareo aho, atsangano ny tånanareo. Ankehitriny, ankehitriny, izao no ezahako lazaina, ry sakaiza, hitanareo. Ankehitriny, io izy io. Ireto mpitoriteny rehetra eto ambony lampihazo ireto. Ary Kristy no nanao izao teny fikasana izao. Hitanareo, voasoratra izany. Rahoviana izany no hiseho? Amin'ny andro farany, mialoha ny Fihavian'ny Tompo mihitsy. Marina ve izany? Tsy maintsy hiseho io arak'izany.

<sup>119</sup> Ankehitriny, izany no Teny izay voaminany anio. Tsy ny hazavan'i Lotera; tsy ny hazavan'i Wesley; ary tsy ny hazavana Pentekotista akory aza. Manohy eo amin'ilay lâlana izany ankehitriny. Ankehitriny, tena tsara Lotera; tena tsara ny Metodista; tena tsara ny Batista; izy rehetra, Pentekotista, tsara. Misy ny karazana rehetra mipetraka eto izao hariva izao. Izany dia tsy ho—izany dia tsy ho—izany dia tsy ho isam-batan'olona. Ahoana moa raha...

<sup>120</sup> Ianareo dia tsy afaka hiteny mihitsy amin'ny Metodista zavatra mikasika an'i Lotera, satria mino ny fanamasinana izy fa i Lotera tsy mino. Hitanareo?

<sup>121</sup> Tsy miteny amin'ny Pentekosta mihitsy ianareo fa "ny fanamasinana no rehetra amin'io," nahita ny famerenana ny fanomezam-pahasoavana izy. Tsy handeha hino an'izany izy. Tsia, nahazo betsaka noho izany izy. Hitanareo? Ary izany no taom-piangonana farany izay nananantsika, ary ny Baiboly dia milaza fa tsy hisy taom-piangonana intsony.

<sup>122</sup> Saingy hisy fivorian'olona anankiray kosa, hitanareo, ary eo isika. Ankehitriny, tsarovy, ilay famantarana farany. Miandry an'ilay zanaka nampanantaina ve isika vahoaka? Atsangano ny tānanareo. Mino ve ianareo fa ianareo no Taranak'i Abrahama amin'ny alàlan'ny maha-ao amin'i Kristy? Atsangano ny tānanareo. Koa, ry Taranak'i Abrahama, raiso ny famantaranareo! Tsy ao anatin'i Babylona izany, tsy ao anatin'ny anaram-piangonan'izao tontolo izao izany. Eto anivonareo izany, ireo izay tsy ao anatin'io loto eo io. Minoa an'izany!

<sup>123</sup> Ity misy vehivavy anankiray, tena vahiny tanteraka amiko izy, mety mitovitovy taona any ho any. Tsy mbola nahita andravehivavy mihitsy aho teo amin'ny fiainako. Raha nahay nanasitrana an'ity vehivavy ity aho dia ho nataoko izany, raha marary izy. Tsy mahafantatra na inona na inona mikasika azy aho. Nahita azy nanangana ny tānany minitra vitsy lasa ve ianareo. Izaho—izaho tsy mbola nahita azy mihitsy. Vehivavy anankiray mijoro eto fotsiny izy.

<sup>124</sup> Androany dia tonga teto izy ireo ary nitondra fonosana karatra fangataham-bavaka, nanafangaro azy rehetra ary nanome azy ireo ho an'ny olona. Ny anankiray nanana ny nomerao iray eto, ary ny nomerao folo iry aoriana iry, nomerao dimy ambin'ny folo, nomerao fito, nomerao...tahaka an'izany fotsiny. Nafangarony izy rehetra, teo imasonareo mihitsy, isan'andro. Ary rehefa voaantso izy ireny, dia voaantso fotsiny eny amin'ny manodidina rehetra eny avy any any rehetra any. Hitanareo? Ary, ankehitriny, ianareo izay tsy mba nahazo karatra fangataham-bavaka, mipetraha fotsiny eo ary minoa. Nahoana no tsy afaka...

<sup>125</sup> Tsongoy ny tenanareo, izao hariva izao, hahita ny ora izay iainantsika. Hitanareo? Ankehitriny, izany dia madiva ho tapitra mihitsy, ihany koa, ry sakaida. Madiva ho tapitra mihitsy!

<sup>126</sup> Ankehitriny, raha ilay Andriamanit'r'i Abrahama no nanangana an'i Jesosy Kristy tamin'ny maty, ka Jesosy no nampanantena fa amin'ny andro farany ilay famantarana mitovy izay Abrahama...izay ilay Anjely (izay Andriamanitra tao amin'nynofon'olombelona) no nanao azy teo anatrehan'i Abrahama, talohan'ny nahatongavan'ilay zanaka

nampanantenaina mihitsy, dia Jesosy no nilaza fa ilay zavatra mitovy ihany no hiseho ankehitriny.

<sup>127</sup> Ankehitriny, mahita an'ireo atomika sy ireo anaram-piangonana isika, sy ireo rehetra ireo, ary ny loto izay misy azy ireo. Hitantsika ny Billy Graham anankiray tany lavitra tany, sy Oral Roberts, ary ireo olona rehetra tany ireo; ny iraka Pentekotista sy ny iraka anaram-piangonana tany, hitantsika izany rehetra izany manohy, mitondra an'ilay famantarana. Billy Graham, teolojiana hatrany amin'ny teboka, izay ninoan'ny anaram-piangonana. Oral Roberts, mpanasitrana hatrany amin'ny teboka, tena marina tokoa fa ny Pentekosta . . .

<sup>128</sup> Saingy jereo eto, misy zavatra hafa nampanantenaina ho an'ny Taranak'i Abrahama. Any izy ireo eo anivon'ireo anaram-piangonana ireo; misy zavatra *avy* ao amin'ny anaram-piangonana natao hitranga, manangona ny olona. Havelatsika handeha izany hatramin'ny rahampitso hariva.

<sup>129</sup> Diniho, tsy mahafantatra an'io vehivavy io aho. Atodiko any aminy ny lamosikoo. Raha hilaza zavatra amin'io vehivavy io ny Tompo Andriamanitra, angamba izany dia—izany dia ara-tokantrano, angamba izany dia ara-bola, angamba izany dia marary; tsy fantatro. Izy no hahafantatra na marina izany na tsia.

<sup>130</sup> Raha hanao ny zavatra mitovy tamin'izay Nataony tamin'izany Izy izao hariva izao, dia hino an'ilay Andriamanitra izay nampanantenain'i Jesosy Kristy fa ho eto amin'ny andro farany ve ianareo? Firy no mino fa miaina tahaka ny tao Sodoma isika, rehefa tafiditra ao amin'ny toetra Sodomita avokoa ny tany rehetra? Firy aminareo no mino fa izay nolazaiko taminareo izao hariva izao no Fahamarinana? Noho izany, ry zanaka sy Taranak'i Abrahama, minoa an'Andriamanitra!

<sup>131</sup> Ankehitriny, dia izany no hanala ao amin'ny sainareo fa miezaka milaza zavatra amin'ilay vehivavy aho, mijery azy manatrika, na manana ny zavatra rehetra momba ny telepatia na izay rehetra tianareo ho fantatra. Ny olona izay mahafantatra momba ny telepatia dia tokony hanana fisainana tsaratsara kokoa noho izany. Hitanareo? Hitanareo? Efa mba nahita mpanao telepatia anankiray nitory ny Filazantsara ve ianareo? Efa mba nahita mpiresaka amin'ny fanahy nitory ny Filazantsara ve ianareo, nanao famantarana sy fahagagana, nanambara fa Jesosy Kristy no tsy miova? Tsia.

<sup>132</sup> Hitanareo, izany fotsiny dia . . . izany dia fisainan'ny olona. Hitanareo, jamba izy ireo. Mino ve ianareo fa mety ho jamba izy ireo? Ny Baiboly no nilaza fa ho izany izy ireo. Marina ve izany? "Kirina, mpieboebo, tia ny fahafinaretana mihoatra noho ny fitiavana an'Andriamanitra, mpanontolo fo, mpanendrikendrika, tsy mahonom-po, tsy tia ny tsara, manana

ny endriky ny toe-panahy araka an'Andriamanitra, nefà mandà ny Heriny.”

<sup>133</sup> Tsy nilaza ve Jesosy, ao amin'ny Masindahy Matio 24:24, fa “Ny fanahy anankiroa amin’ny andro farany dia saiky hamitaka ny tena Voafidy, raha azo natao”? Saingy tsy azo atao izany. Efa tao anatin’ny fisainan'Andriamanitra izy ireo tany amin’ny voalohany, ary ampanhan'Andriamanitra izy ireo.

<sup>134</sup> Ankehitriny, Andriamanitr'i Abrahama, Isaka, ary Jakoba, aoka ho fantatra izao hariva izao fa miteny ny Fahamarinana momba Anao aho. Ianao izany, Tompo. Am-panetre-tena dia avelao ity Mpanomponao ho afaka hanala ny fisainan’izy ireo manokana amin’ny lèlana, fa Ianao no mampiasa ny vatanay ho an’ny Vonitorahitram. Amin’ny Anaran'i Jesosy, ilay Zanak'Andriamanitra. Amena.

<sup>135</sup> Inona ny fanomezam-pahasoavana? Tsy zavatra anankiray izay alainareo sy kapainareo ary ahodinareo. Tsia, tsia. Izany dia fahafantarana hoe ahoana no hanalana ny tenanareo hiala amin’ilay lèlana mba hahafahan'Andriamanitra hampiasa anareo. Ny fanomezam-pahasoavana dia manala ny tenanareo fotsiny, avy eo dia Andriamanitra no mampiasa azy.

<sup>136</sup> Io ramatoa aoriako io dia ho faty avy hatrany raha tsy sitrana izy. Io ramatoa aoriako io dia efa nivavahan’ny lehilahy hafa fotsiny, vao haingana. Tratry ny homamiadana izy. Ilay homamiadana dia ao amin’ny nonony ary ao amin’ny avokavony koa. Ary vao avy nivavahana vao haingana izy, ary miezaka izy ny hanaiky an’izany amin’ny alàlan’ny finoana fa sitrana izy. Izany no HOY NY TOMPO HOE! Marina ve izany, ramatoa? [Hoy ilay ramatoa hoe, “Eny, tena marina izany.”—Mpand.] Raha izany no izy, ahofahofao—ahofahofao any amin’ny mpanatrika ny tènanao. Ilay Andriamanitr'i Abrahama dia mbola velona! Eny àry, mandehàna mino izay inoanao dia ho tsara ianao. Amena.

Mino ianareo? Hoy ianareo hoe, “Ahoana ny amin’ny mpanatrika?”

<sup>137</sup> Io vehivavy mipetraka eto io miaraka amin’ny . . . iry amin’ny faran’ny laharana, ramatoa faharoa eo io. Rehefa nihodina tetra fotsiny aho dia nahita zavatra, zavatra anankiray nanodidina ny tènany, fijerena tosi-drà. Tratry ny tosi-drà ambony izy. Marina ve izany, ramatoa? Atsangano ny tènanao. Raha mino ianao, dia hidina ny tosi-drànao. Ilay Andriamanitr'i Abrahama dia mbola eo amin’ny sehatra. Izy dia izay tena naha-izy azy tokoa, ilay Tenin'Andriamanitra ho an’ity andro ity!

<sup>138</sup> Manao ahoana ianao? Mino ianao ankehitriny? Manàna finoana an'Andriamanitra! Miseho ho tahaka ny zaza anankiray fotsiny. Andriamanitra no mahalala ny fona, ramatoa tanora, izaho tsy mahalala. Mino ve ianao fa Andriamanitra dia afaka manambara amiko hoe inona no tsy mety? Hino Azy ve ianao

raha hanao aho? Tsy ho anao ilay izy, ho an'ny olon-kafa ilay izy, ny anadahinao izany. Ary tena matotra mihitsy izy ary any amin'ny tanàna avaratra eto izy, Tulare. Ary any amin'ny hopitaly izy, ary tratry ny aretin-drà izy, ary ireo dokotera dia nandao azy ho faty. Tsy misy fanantenana intsony. Marina izany. Mino ve ianao? [Ilay ramatoa, nitomany, nanao hoe, "Eny."—Mpand.] Eny àry. Inona iny an-tànanao iny? Alaivo iny ary apetraho eo aminy izany. Ary aza misalasala amin'izany. Minoa! Amena.

<sup>139</sup> Mino ve ianao? Tsy mbola nahita an'ilay ramatoa mihitsy aho teo amin'ny fiainako. Fa Andriamanitra dia mijanona ho Andriamanitra! Ankehitriny, lazao amiko ny olombelona anankiray ve mahavita an'izao? Tsy tao amin'ny famoronana ny olombelona ny fanaovana an'izao. Izany dia Andriamanitra izay nampanantenaï'i Jesosy Kristy fa ho eto amin'ny andro farany ary hanamarina ny Tenany (eo anatrehan'ny Taranak'i Abrahama mihitsy) tahaka ny tamin'ny andron'i Sodoma.

<sup>140</sup> Ankehitriny eto, tsy mahafantatra an'ilay ramatoa aho, samy tsy mifankahalala izahay, ataoko fa izao no fihaonanay voalohany eo amin'ny fiainana. Mino ahy ho Mpanompony ve ianao? Mino an'izao ho ny Teny ve ianao? Ary fantatrao fa raha... Ity Teny ity dia mbola mpamantatra ny eritreritra sy ny fisainan'ny fo. Marina ve izany? Ny Teny dia Mpanasitrana, ihany koa, raha mety mino an'Izany ianao. Mino ianao? Ianao dia voaaloka, ihany koa, miaraka amin'ny aloka mainty anankiray. Homamiadana io. Ary mino ve ianao fa Andriamanitra dia afaka miteny amiko hoe aiza io homamiadana io? Ao amin'ny tsinay kely ilay izy, izany koa no lazain'ny dokotera. Mino ve ianao ankehitriny fa ho sitrana ianao? Mandehana, ary aza misalasala mihitsy, ary Andriamanitra no hanao anao ho tsara. Amena.

<sup>141</sup> Mino ve ianareo, ny rehetra? Izay Nampanantenaïny tanteraka mihitsy fa hataony! Manàna finoana an'Andriamanitra, aza misalasala.

<sup>142</sup> Samy tsy mifankahalala isika. Izaho tsy mahafantatra anao. Raha tsy mifankahalala isika, dia aoka ho fantatry ny mpanatrika izany, atsangantsika ny tènantsika. Tsy mbola nahita an-dravehivavy mihitsy aho teo amin'ny fiainako.

<sup>143</sup> Mino ve ianao eo? Mino ve ianao fa Jesosy Kristy izany? Inona ilay izy? Ny Teny izany. Rehefa nandà an'Izany ireo olona ireo, tsy olona no nolavin'izy ireo, ilay Teny no nolavin'izy ireo. Izany dia ilay Teny izay tany ivelany, tsy afaka niverina niditra.

<sup>144</sup> Ankehitriny, dia vahiny amiko ilay ramatoa. Tsy mbola nahita azy mihitsy aho teo amin'ny fiainako. Andriamanitra dia Mpanasitrana. Mety tsy ho an'ny fanasiranana ilay izy, mety ho an'ny zavatra hafa, fa raha Andriamanitra no hanazava amiko hoe inona ilay olanao, dia hino ahy ve ianao? Ny zavatra voalohany tianao hivavahana, dia, tratry ny aretin-

tsofina ianao. Ny iray amin'ireo sofinao, tsy afaka mandre avy amin'io ianao. Marina izany. Izany no marina. Ary ianao koa dia manana fahazarana, ary te-hiala amin'izany fahazarana izany ianao, ny fifohana sigara izany. Apetraho eo amin'ilay sofinao tsara ny rantsan-tànananao, eny àry, ilay sofinao tsara. Eny àry. Ankehitriny minoa an'Andriamanitra ary zory ny làlanao, ary aza... ary tsy hifoka sigara intsony koa ianao raha hino ianao. Mandehana, ary hitahy anao ny Tompo.

Hitanareo izay nitranga. Tsy tena misy ve Izy?

<sup>145</sup> Tsy fantatro ianao, samy tsy mifankahalala isika. Tsy mbola nahita anao mihitsy aho teo amin'ny fiainako, fa Andriamanitra mahafantatra anao. Raha afaka miteny amiko Andriamanitra ny zavatra mikasika anao, hino ve ianao?

<sup>146</sup> Ny mpanatrika rehetra ve hino? Misy olona mahafantatra an-dravehivavy ve ato? Misy olona mahafantatra an-dravehivavy ve ato amin'ny mpanatrika? Eny àry, ianareo no mahalala na marina izany na tsia. Ity no hametraka an'izany. Ity no hiteny ny fahamarinana.

<sup>147</sup> Ankehitriny dia mahita ianao izay nitranga tao anatin'ny minitra vitsy lasa fotsiny. Hitanao? Izany dia... Mivembena aho. Hitanao? Izany dia ny zavatra rehetra fotsiny no lasa manajamba ahy. Hitanao, Izany dia mamantatra-. Hitanao, ny Fanahy Masina Izany. Tsy izaho izany. Ny Teny nampanantenaina ho an'izao andro izao izany. Tsy nisy mihitsy izany hatrany amin'ny andron'ny apostoly, tsy nisy mihitsy izany. Fa ao amin'izay nolazaina hoe, "Ao alohan'ny fihavian'ny Zanak'olona mihitsy. Tahaka ny tamin'ny andron'i Lota, dia ho toy izany koa amin'ny fihavian'ny Zanak'olona." Ireo tsy mpino dia tsy mino an'Izany. Tsy natao hino an'Izany izy ireo. Fa ireo mpino no mino an'Izany!

<sup>148</sup> Ankehitriny, raha hanambara an'izao ny Fanahy Masina, firy no hino amin'ny fonareo rehetra, hanangana ny tànanareo ve ianareo?

<sup>149</sup> Tratry ny ratra ianao. Voan'ny lozam-piarakodia ianao, nanosika taolana maromaro hihetsika ao amin'ny tendanao izany. Ianao koa dia manana voa voatosika nihetsika. Marina izany, tsy izany ve? Mino ianao? Ho tena tsara ianao. Derao ny Tompo.

<sup>150</sup> Mino ve ianao fa manasitrana ny aretin'ny voa Andriamanitra? Noho izany dia mandehana ary ekeo ny fahasitrananao.

<sup>151</sup> Avia, ramatoa. Aty jerena. Mino ianao fa Andriamanitra dia manasitrana ny aretim-po? Eny àry, zory ny làlanao dia minoa, ary dia tena ho tsara ny fonao.

<sup>152</sup> Avia eto. Mino ianao fa mahay manasitrana ny lamosinao Andriamanitra, hanao anao ho tsara? Mandehana ka minoa àry an'izany.

Minoa fotsiny an'Andriamanitra, izany ihany no tsy maintsy hataonareo!

<sup>153</sup> Avia, ramatoa. Mino ianao fa Andriamanitra no manasitrana ny aretim-bavony? Mandehana, hano ny sakafonao, minoa amin'ny fonao rehetra.

<sup>154</sup> Avia. Mino ianao fa Andriamanitra no manasitrana ny aretin-kozatra? Koa mandehana, minoa, ary manaova...ary Andriamanitra hanao anao ho tsara.

<sup>155</sup> Eny àry, avia. Mino amin'ny fonareo rehetra ianao? Mino ianao? Aretin-kozatra, indray koa. Mino ve ianao fa Andriamanitra dia afaka hanao anao ho tsara? Mandehana, minoa an'izany, manaova hoe, "Misaotra Anao, Tompo."

Firy no mino ato? Mino ve ianareo?

<sup>156</sup> Io vehivavy mipetraka eto io miaraka amin'ny akanjo mena, manangana ny tànany eto io, mararin'ny fiakaran'ny tosi-drà. Mino ianao fa afaka manao anao ho tsara Andriamanitra? Mino ianao? Eny àry. Apetraho eo amin'io ramatoa eo akaikinao eo io ny tànanao, teneno aminy fa efa manomboka ho tena tsara ny feony. Amena.

Izany no izy. Amena. Mino ve ianareo? Manàna finoana!

<sup>157</sup> Io misy lehilahy anankiray mipetraka eto, tratry ny fahaverezan-drà izy. Mino ve ianao, tompoko, mipetraka eo io? Eny, tratry ny fahaverezan-drà ianao. Mino ianao fa ho sitrana izany?

<sup>158</sup> Ilay ramatoa eo akaikinao io dia tratry ny fahaverezan-drà koa, ary marary lamosina izy. Mino ianao fa Andriamanitra dia hanasitrana anao? Mino ianao? Atsangano ny tànanao ary ekeo izany. Minoa.

<sup>159</sup> Io ramatoa eo akaikinao io dia marary ao amin'ny tongony sy ny maojany. Mino ve ianao fa marina izany, ramatoa? Mino ianao fa ho sitrana? Eny, atsangano ny tànanao, manaova hoe, "Manaiky izany aho."

<sup>160</sup> Eny ary, ilay ramatoa eo akaikiny io dia tratry ny areti-mifindra. Mino ianao fa Andriamanitra dia hanasitrana ny areti-mifindra, ramatoa tanora manao solomaso? Atsangano ny tànanao, manaova hoe, "Manaiky izany aho." Eny àry, minoa an'izany.

<sup>161</sup> Ilay ramatoa eo akaikiny io dia tratry ny aretin'ny voa. Mino ve ianao fa Andriamanitra dia hanasitrana ny aretin'ny voa, ramatoa? Eny àry, atsangano ny tànanao, ekeo izany.

<sup>162</sup> Ilay ankizivavy kely eo akaikiny io dia tratry ny fivontosan-tenda. Mino ianao fa Andriamanitra dia hanasitrana an'io fivontosan-tenda io? Atsangano ny tànanao, ekeo izany.

<sup>163</sup> Firy no mino amin'ny fonareo rehetra? Koa mijoroa àry amin'ny tongotrareo dia ekeo izany. Mitsangàna eo amin'ny Fanatrehan'ilay Andriamanitr'i Abrahama, Isaka, ary Jakoba.

<sup>164</sup> Amin'ny Anaran'i Jesosy Kristy Tompo enga anie hirotsaka ato amin'ny trano ny Fanahy Masina ankehitriny ka hanasitrana ny olona rehetra ao amin'ny Fanatrehany Masina! 

*ANDRIAMANITRA NO MPANDIKA TENINY MANOKANA* MAG64-0205  
(God Is His Own Interpreter)

Ity Hafatr'i Rahalahy William Marrion Branham ity, izay notoriana tamin'ny Teny Anglisy ny Alarobia hariva, 5 Febroary, 1964, tao amin'ny Kern County Fairgrounds ao Bakersfield, California, U.S.A. dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarain'ny Voice Of God Recordings.

MALAGASY

©2013 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)